



CONVENIO DE COLABORACIÓN EN MATERIA DE FORMACIÓN ENTRE A ACADEMIA GALEGA DE SEGURIDADE PÚBLICA E O CONCELLO DE SANTIAGO DE COMPOSTELA.

A Estrada, a 12 de xuño de 2012.

REUNIDOS



DUNHA PARTE, D. José Carlos García Bouzas, director xeral da Academia Galega de Seguridade Pública (AGASP), actuando no seu nome e representación en virtude das competencias que ten atribuídas polo artigo 12 da Lei 1/2007, do 15 de xaneiro, da Academia Galega de Seguridade Pública.



DOUTRA, D. Ángel Benito Currás Fernández, alcalde-presidente do Concello de Santiago de Compostela, actuando en virtude das súas facultades, segundo o establecido no artigo 124 da Lei 7/1985, do 2 de abril reguladora das Bases de Réxime Local.

Ambas partes interveñen na representación e coas facultades que os seus respectivos cargos lle confiren, recoñecéndose reciprocamente capacidade e lexitimación bastante en Dereito para outorgar e firmar o presente Convenio de Colaboración, e tal efecto

EXPOÑEN:



I.- Conforme á Lei 1/2007, da Academia Galega de Seguridade, este centro é un organismo autónomo de carácter administrativo, adscrito á consellería competente en materia de interior e xustiza. Entre outros fins, a AGASP ten encomendada a función de organizar e impartir os cursos de formación continua, perfeccionamento e especialización dos membros dos corpos de policía local, segundo indica o artigo 4 da devandita lei, que tamén prevé no seu artigo 5.2 a función de promover relacións de intercambio e colaboración, coas universidades e institucións de Galicia.

II.- Que conforme aos artigos 137 e 141 da CE., a Lei 7/1985, do 02 de abril, Reguladora das Bases de Réxime Local e demais lexislación estatal e autonómica, o Concello da Santiago de Compostela é unha entidade local territorial, que ten personalidade xurídica propia e plena capacidade para o cumprimento dos seus fins e dispón de Corpo de Policía Local.


III.- Que o artigo 57 da Lei de Bases de Réxime Local contempla o Convenio como un dos instrumentos de carácter consensual, a través dos cales pode ter lugar a cooperación económica, técnica e administrativa entre os entes locais e calquera das restantes administracións territoriais.

IV.- Que en aras dos principios de eficacia e eficiencia que deben presidir toda actuación administrativa, ambas partes detectan a necesidade de cooperar no exercicio da función de formación continua e perfeccionamento dos membros da policía local, porque brinda a oportunidade de multiplicar os logros de cada institución reducindo os custos.

Que advertidos e convencidos do interese público e común desa colaboración, acordan formalizalo xuridicamente no presente convenio e co contido que se deriva das seguintes


CLÁUSULAS:

PRIMEIRA: Obxecto do convenio.



O obxecto do presente convenio é acordar un marco de colaboración entre a AGASP e o Concello de Santiago de Compostela, para a formación continua do Corpo de Policía Local dese concello.

Esta formación levarase a cabo mediante cursos e demais accións formativas sobre temas que sexan de interese profesional e que supoñan unha mellora da súa cualificación e eficacia no servizo, a través do mantemento ou potenciación da súa capacitación, así como mediante a participación en actividades de difusión das funcións, medios e procedementos dos Corpos de Policía Local.



A tal efecto organizaranse, durante o ano 2012 cursos ou actividades formativas, segundo a programación anual establecida polo Concello de Santiago de Compostela no seu Plan de Formación Continua, e que será remitida á AGASP coa antelación suficiente.

SEGUNDA: Organización das actividades formativas.

A organización dos cursos, xornadas e das accións formativas en xeral, deberá axustarse ás pautas seguintes:

1. O deseño, estrutura, obxectivos e as datas de cada curso serán consensuados por ambas

as dúas partes, podendo ser propostos por calquera delas indistintamente.

2. A AGASP comprométese a elaborar os programas, documentación e material para o alumnado.
3. As solicitudes de participación que remita o alumnado dirixíranse ao Concello de Santiago de Compostela que será o último responsable da selección de admitidos/as ás actividades formativas.
4. Os criterios de selección serán os que estableza o Concello de Santiago de Compostela para cada convocatoria.
5. Feita a selección, confeccionarase unha listaxe de admitidos/as á que se lle dará a publicidade habitual para que cada solicitante saiba que está admitido/a e poida comunicar a imposibilidade de asistencia ao curso, se así fose.



TERCEIRA: Profesorado, aulas e locais.

De forma conxunta decidiranse a selección e contratación dos profesores.

As clases impartíranse nas aulas ou instalacións do Concello de Santiago de Compostela, que presenten idoneidade, capacidade e medios técnicos bastantes, ou noutras instalacións que decidan ambas partes.




CUARTA: Seguimento, coordinación e control do desenvolvemento dos cursos.

O Concello de Santiago de Compostela, a través do seu persoal, ou polo que se determine en cada caso pola Comisión de seguimento, asume o control dos cursos, xornadas ou calquera acción formativa derivada deste marco de colaboración, especialmente en canto á asistencia dos alumnos ás clases, o funcionamento e emprego de medios técnicos e a atención aos docentes.

Nos diplomas que se expidan ao remate de cada curso figurarán ambas institucións, e estarán asinados polo alcalde do Concello de Santiago de Compostela e polo director xeral da AGASP. O deseño dos mesmos será determinado conxuntamente.


As certificacións que poidan requirir os/as docentes ou alumnos/as sobre a súa participación ou asistencia nas actividades formativas, poderán ser expedidas por calquera das partes, facendo constar a organización conxunta.

QUINTA: Financiamento e xestión económica dos cursos ou xornadas.



O financiamento das actividades formativas desenvolvidas ao abeiro do convenio axustarase as seguintes regras:

1.- O Concello de Santiago de Compostela sufragará o pago de docentes, horas lectivas, axudas de custo, coordinación e outros gastos de cada curso ou acción formativa, con cargo á aplicación orzamentaria 100 92000 16200, de formación e perfeccionamento do persoal municipal, nos termos fixados no Plan de Formación Continua.



2.- A sinatura deste convenio non implica, por parte da AGASP, compromiso de gasto con cargo ás partidas orzamentarias do estado de gastos dos orzamentos xerais da Comunidade Autónoma de Galicia para o ano 2012.

SEXTA: Requisitos para a obtención do diploma e réxime disciplinario.

Ambos aspectos se regularán pola normativa aplicable na AGASP para cada tipo de acción formativa, que se especificarán en cada convocatoria.

SÉTIMA: Comisión de seguimento.

Para o desenvolvemento e seguimento deste convenio créase unha Comisión Mixta paritaria, composta por dúas persoas designadas por cada parte, que adoptará os acordos por unanimidade.

Son funcións desta comisión de seguimento as atribuídas no artigo 6.3 da Lei 30/1992, do 26 de novembro, de Réxime Xurídico das Administracións Públicas e do Procedemento Administrativo Común.

OITAVA.- Modificación, denuncia e resolución do convenio.

As partes poderán modificar ou resolver o presente convenio en calquera momento por mutuo acordo. Así mesmo, poderán denunciar o presente convenio en calquera momento por vontade expresa de calquera das partes cun preaviso de quince días naturais.

O incumprimento de calquera das obrigas contraídas no presente convenio por unhas das partes facultará á outra para resolver ó mesmo, cos efectos que legalmente procedan.

NOVENA.- Réxime xurídico.

Este convenio ten natureza administrativa e rexerase pola Lei 30/1992, de 26 de novembro, de Réxime Xurídico das Administracións Públicas e do Procedemento Administrativo Común, e pola lexislación sobre a materia obxecto do mesmo; adicionalmente pola lexislación de contratos do sector público e demais normas de dereito administrativo; e en defecto deste último polas normas de dereito privado.

As discrepancias que xurdan pola aplicación do presente convenio serán resoltas pola Comisión de Seguimento prevista na cláusula sétima. De persistir as mesmas resolverá o Conselleiro de Presidencia, Administracións Públicas e Xustiza, e a Xunta de Goberno Local do Concello de Santiago de Compostela, no ámbito das respectivas competencias, poñendo

fin á vía administrativa.

DECIMA.-Vixencia

O presente convenio estenderá a súa vixencia dende a data da sinatura por tódalas partes ata o día 31 de decembro de 2012, prorrogándose de forma expresa por anualidades naturais, salvo denuncia de calquera das partes antes da súa finalización, ou da finalización de cada unha das prórrogas.

Este acordo de colaboración obriga ao cumprimento do expresamente pactado, someténdose tódalas partes ao acordade en todas as estipulacións, e como proba de conformidade, asinan o presente convenio, no lugar e data arriba sinalados.

**POLA ACADEMIA DE
SEGURIDADE PÚBLICA**

Asdo. José Carlos García Bouzas.

**POLO CONCELLO DE
SANTIAGO DE COMPOSTELA**

Asdo. Ángel Benito Curras Fernández.

